



## Reglamente d'absenzas e congedis

SCOLA SEDRUN



# Reglament d'absenzas e congedis

Sefundond sils artechels 28/681/96 dalla Lescha da scola cantunala dils 02-03-2012, sin artechel 25 dall'Ordinaziun tier la lescha da scola cantunala sco era sin artechel 122.12 digl Uorden da scola dalla vischnaunca Tujetsch, relai il Cussegl da scola dalla vischnaunca Tujetsch suandont reglament d'absenzas e congedis.

## 1) Principi

Las personas cun la pussonza dils geniturs ein responsablas che lur affons frequentien regularmein la scola. Personas cun la pussonza dils geniturs che cunterfan a questa stipulaziun vegnan castigai tenor artechel 96 dalla lescha da scola cantunala.

## 2) Absenzas

### a) Absenzas perstgisadas

Sco perstgisas per absenzas valan en special:

- malsogna ni accident dalla scolara/dil scolar
- prighel da lavinas, relaziuns da vias buca responsablas
- visetas tier il dentist ni il miedi
- mort d'in confamigliar ni da personas cun ina stretga relaziun persunala e sepulturas da tierparents

La persuna d'instrucziun da classa ei mintgamai d'informar ad uras davart l'absenza.

En cass d'absenzas che cuozan dapli che 5 dis (accident, malsogna) sa il meinascola pretender dalla persuna responsabla per l'educaziun in attestat dil miedi.

### b) Absenzas buca perstgisadas

Sche l'instrucziun vegn munchentada per in auter motiv ni per in motiv previsibel, sche sto la scolara/il scolar procurar avon l'absenza per la lubientscha necessaria. Cass cuntrari ei l'absenza, tenor art. 55 dalla Lescha da scola cantunala, buca perstgisada.

## 3) Congedis

Tenor art. 28 dalla Lescha da scola cantunala sa il Cussegl da scola (ni las personas cumpetentas) dar in congedi da tochen 15 dis ad onn ad ina scolara/in scolar sin fundament da raschuns giustificadas.

#### 4) Damondas/lubientschas da congedi

##### a) Damondas da congedi

Damondas da congedi ein adina d'inoltrar a scret alla persuna d'instrucziun da classa cun risguardar ils suandonts termins:

- per absenzas dad 1 di 3 dis avon
- per absenzas da varga 1 di 1 jamna avon

La persuna d'instrucziun da classa decida tenor cumpetenzza ni dat vinavon la damonda al meinascola.

##### b) Lubientschas da congedi

Per las lubientschas da congedi ein cumpetents:

- persuna d'instrucziun da classa damondas per 1 di
- meinascola damondas tochen 2 dis
- presidi dil Cussegl da scola damondas da 3 - 5 dis
- Cussegl da scola damondas da 6 - 15 dis
- Uffeci per la scola populara ed il sport damondas da varga 15 dis

Avon e suenter las vacanzas dat ei per regla negins congedis.

En cass da dubi sto l'istanza superiura vegnir integrada. Il meinascola sto vegnir informaus sur da mintga congedi. Plinavon ein las absenzas dallas scolaras/dils scolars da purtar el Cumpogn da viadi.

##### c) Dis da joker

Mintga scolara/scolar ha la pusseivladad da prender 4 ga per onn da scola in  $\frac{1}{2}$  di da joker. Igl ei naturalmein era pusseivel da prender 2 ga in  $\frac{1}{2}$  di da joker per saver prender liber in entir di.

Ils dis da joker astgan vegnir retratgs tut ils dis da scola.

La persuna d'instrucziun da classa sto vegnir informada 1 di avon.

## 5) Motivs per congedis

### a) General

- Da principi dat ei negin dretg sin congedis.
- Il congedi duei veramein pertucar la scolara/il scolar directamein. La scolara/il scolar astga buca mo esser aspectatur, accumpignader ni gidonter.
- Il congedi duei mo vegnir lubius sch'igl ei buca pusseivel d'exequir l'activitad el temps liber.
- La lubientscha per in congedi duei buc esser dependenta dallas prestaziuns en scola, la persuna responsabla per l'educaziun dalla scolara/dil scolar duei denton vegnir informada sche la promoziun digl affon ei periclitada.
- Per motivs disciplinars e pervia da schliet deputament sa ina damonda da congedi vegnir renviada ni lubida mo cun resalva.
- La scolara/il scolar pren suenter la materia tractada durant s'ius temps d'absenza e s'interessescha sezza/sez (resp. ils geniturs) partenent il material ch'el drova.

### b) Congedis da sport e da tempra culturala

- La scolara/il scolar duei esser qualifcaus specialmein en certas disciplinas sportivas ni sin in camp cultural (musica, cant, art, etc.).
- Ina qualificaziun/ina damonda da trenadras/trenaders, dirigentas/dirigents ni d'instanzas sportivas e culturalas duei esser avon maun.

### c) Fuffernadis (mo pil scalem ault)

- Sche pusseivel han las scolaras/ils scolaras d'absolver lur fuffernadi durant il temps da vacanzas. Tier cass motivai sa la persuna d'instrucziun da classa lubir in fuffernadi durant il temps da scola, en special sch'el ei neccessaris per survegnir la piazza d'emprendissadi. Per regla vegnan ils fuffernadis lubi suenter il secund semester dil secund davos onn da scola (mira directivas e formular per fuffernadis dil scalem ault).
- Las scolaras/ils scolaras dil secund scalem ault survegnan la pusseivladad dad ir da fuffernar per 5 dis durant las jamnas dalla scola sur gl'entir onn da scola ora – tut tenor lur basegns.

### d) Congedi da scoletta

- Ils scolarets astgan vegnir pri ord scoletta per **max. 3 singuls** dis eifer igl onn da scola senza indicar in motiv. Per congedis dad ulteriurs dis ston ils geniturs inoltrar ina damonda da congedi tenor quest reglament.
- Il termin d'annunziar il congedi ston vegnir teni en.

## 6) Informaziuns e surpassaments

Ils geniturs vegnan informai davart il reglament d'absenzas e congedis a caschun dalla sera da geniturs. Las scolaras/ils scolars vegnan informai mintgamai l'entschatta digl onn da scola dalla persuna d'instrucziun da classa.

Surpassaments entras scolaras/scolars vegnan castigai cun lavur cumina ni pensums da scola supplementars el temps liber. La surveglanza succeda entras il meinascola.

Surpassaments caschunai per culpa dallas personas cun la pussanza dils geniturs vegnan castigai cun ina multa da tochen frs. 500.00 (LS art. 96). Sche quels cass serepetan sa la multa vegnir dublegiada.

## 7) Disposiziuns finalas

Quei reglament entra en vigur cun l'entschatta digl onn 2021. El remplazza tut ils reglaments d'absenzas e congedis valeivels tochen uss.

**Approbaus dil Cussegl da scola e dil meinascola ils 30 d'uost 2021.**